



【附方】旧二，新六。小便血淋酸草捣汁，煎五苓散服之。俗名醋啾啾是也。王璆百一选方。诸淋赤痛三叶酸草洗，研取自然汁一合，酒一合和匀。空心温服，立通。沈存中灵苑方。二便不通酸草一大把，车前草一握，捣汁，入砂糖一钱，调服一盞。不通再服。摘玄方。赤白带下三叶酸草，阴干为末。空心温酒服三钱匕。千金方。痔疮出血雀林草一大握，水二升，煮一升服。日三次，见效。外台秘要。癣疮作痒雀儿草即酸母草，擦之，数次愈。永类方。蛇虺螫伤酸草捣傅。崔氏方。牙齿肿痛酸浆草一把洗净，川椒四十九粒去目，同捣烂，绢片裹定如箸大，切成豆粒大。每以一块塞痛处，即止。节斋医论。

地锦

【释名】地肤、地瞵、夜光、承夜、草血竭、血见愁、血风草、马蚊草、雀儿卧单、酱瓣草、猢猻头草。

【气味】辛，平，无毒。

【主治】地肤：主心气，女子阴疝血结。别录。地锦：通流血脉，亦可治气。嘉祐。主痲肿恶疮，金刃扑损出血，血痢下血崩中，能散血止血，利小便。时珍。

【附方】旧一，新十一。脏毒赤白地锦草洗，暴干为末。米饮服一钱，立止。经验方。血痢不止地锦草晒研。每服二



钱，空心米饮下。乾坤生意。大肠泻血血见愁少许，姜汁和捣，米饮服之。戴原礼证治要诀。妇人血崩草血竭嫩者蒸熟，以油、盐、姜淹食之，饮酒二杯送下。或阴干为末，姜酒调服一二钱，一服即止。生于砖缝井砌间，少在地上也。危亦林得效方。小便血淋血风草，井水搗服，三度即愈。刘长春经验方。金疮出血不止。血见愁草研烂涂之。危氏得效方。恶疮见血方同上。疮疡刺骨草血竭捣卷之，自出。本草权度。痲肿背疮血见愁一两，酸浆草半两焙，当归二钱半焙，乳香、没药各一钱二分半，为末。每服七钱，热酒调下。如有生者，搗酒热服，以渣傅之亦效。血见愁惟雄疮用之，雌疮不作。杨清夏外科方。风疮疥癩血见愁草同满江红草捣末，傅之。乾坤秘榘。趾间鸡眼割破出血。以血见愁草捣傅之妙。乾坤秘榘。脾劳黄疸如圣丸：用草血竭、羊膻草、桔梗、苍术各一两，甘草五钱，为末。先以陈醋二碗入锅，下皂矾四两煎熬，良久下药末，再入白面不拘多少，和成一块，丸如小豆大。每服三五十丸，空腹醋汤下，一日二服。数日面色复旧也。乾坤秘榘。

仙人掌草

【气味】苦，涩，寒，无毒。

【主治】肠痔泻血，与甘草浸酒服。苏颂。焙末油调，搽小儿白秃疮。时珍。

崖棕

【气味】甘，辛，温，无毒。

【主治】妇人血气并五劳七伤。以根同半天回、鸡翁藤、野兰根，四味洗焙为末。每服二钱，温酒下。丈夫无所忌，妇人忌鸡、鱼、湿面。苏颂。

紫背金盘草

【气味】辛，涩，热，无毒。

【主治】妇人血气痛，洗焙研末，酒服半钱。孕妇勿服，能消胎气。忌鸡、鱼、羊血、湿面。苏颂。

白龙须

【气味】平，无毒。

【主治】男子妇人风湿腰腿疼痛，左瘫右疾，口目喎斜，及产后气血流散，胫骨痛，头目昏暗，腰腿痛不可忍，并宜之。惟虚劳瘫痪不可服。研末，每服一钱，气弱者七分，无灰酒下。密室随左右贴床卧，待汗出自干，勿多盖被，三日勿下床见风。一方：得疾浅者，用末三钱，瓷瓶煮酒一壶。每日先服桔梗汤少顷，饮酒二盞。早一服，晚一服。保寿堂方。

【附方】新一。诸风瘫痪筋骨不收。用白龙须根皮一两，闹羊花即老虎花七分，好烧酒三斤，封固，煮一炷香，埋土中一夜。能饮者三杯，不能饮者一杯，卧时服。服至三五杯，见效。但知痛者可治。坦仙皆效方。

